

七十二家集

孫廷尉集題詞

臨川世說酷詆興公謂其負詞
藻而多穢行褚季野至欲擲
諸水以壓天譴渣滓之累極矣
然其自評曰托懷玄勝高寄蕭
條無所與讓爾時至與玄度竝

稱自是清流其諫移都與桓元
子抗同異自是勁骨生平穢行
了無足據臨川何所指而目之
哉史又稱溫王郗庾咸須綽為
碑然後登石則既為時所重矣
世說又載興公作庾公誄庾道恩

曰先君與君自不至于此又王孝
伯讀長史誄曰亡祖何至與此人
周旋夫須碑然後登石豈其作
誄詞而橫遭抹殺乎恐出後人
輕薄未可為準也天台一賦金
石聲傳播至今范滂期尚有未

中宮高之慨此大言欺人耳獨
惜諸公碑為唐人割裂幾盡但
存崖畧無復斐然余於唐人
不能無憾云

重光協洽元正下澣張燮謨于
石隱書巢



孫廷尉集目錄

卷之一

賦

天台山賦

望海賦 又

遂初賦

詩

表哀詩 并序

三月三日

蘭亭集詩二首

王羲之蘭亭集詩二首附

秋目

情人碧玉歌二首

疏

諫移都洛陽疏

爲功曹參軍駁事牋

論

喻道論

卷之二

序

蘭亭集後序

王羲之蘭亭集序附

碑

太尉庾亮碑

太傅褚裒碑

丞相王導碑

太宰郗鑒碑

司空庾冰碑

潁州府君碑

頌

聘士徐君墓頌

有序

贊

賀司空循像贊

有序

孔松楊像贊

有序

某太常碑贊

老子贊

商丘子贊

原憲贊

道安贊

釋道安贊

康僧會贊

康法朗贊

劉元真贊

支孝龍贊

法威贊

笠法汰贊

銘

太平山銘

漏刻銘

樽銘

誄

庾公誄

王長史誄

附錄

孫綽傳

唐太

遺事

集評

孫廷尉集卷之一

晉太原孫綽與公著

明閩漳張爕紹和纂

賦

天台山賦

天台山者蓋山嶽之神秀也涉海則有方丈蓬萊登陸則有四明天台皆玄聖之所遊化靈仙之所窟宅夫其峻極之狀嘉祥之美窮山海之環富盡人神之壯麗矣所以不列於五嶽闕載

於常典者豈不以所立冥與其路幽迥或倒影
於重溟或匿峯於千嶺始經魑魅之塗卒踐無
人之境舉世罕能登陟王者莫由禋祀故事絕
於常篇名標於奇紀然圖像之興豈虛也哉非
夫遺世翫道絕粒茹芝者焉能輕舉而宅之非
夫遠寄冥搜篤信通神者何肯遙想而存之余
所以馳神運思晝詠宵興俛仰之間若已再升
者也方解纓絡永託茲嶺不任吟想之至聊奮
藻以散懷

太虛遶廓而無闕運自然之妙有融而爲川瀆
結而爲山阜嗟台嶽之所奇挺寔神明之所扶
持陰牛宿以曜峯託靈越以正基結根彌於華
岱直指高於九疑應配天於唐典齊峻極於周
詩邈彼絕域幽邃窈窕近智者以守見而不之
之者以路絕而莫曉哂夏蟲之疑冰整輕翮而
思矯理無隱而不彰啓二奇以示兆赤城霞起
以建標瀑布飛流以界道覩靈驗而遂徂忽乎
吾之將行仍羽人於丹丘尋不死之福庭苟台

嶺之可攀亦何羨於層城釋域中之常戀暢超
然之高情被毛褐之森森振金策之鈴鈴披荒
榛之蒙龍陟峭嶒之崢嶸濟檀溪而直進落五
界而迅征跨穹隆之懸磴臨萬丈之絕冥踐莓
苔之滑石搏壁立之翠屏攬樛木之長蘿援葛
藟之飛莖雖一冒於垂堂乃永存乎長生必契
誠於幽昧履重險而逾平旣克濟於九折路威
夷而脩通恣心目之寥朗任緩步之從容藉萋
萋之纖草蔭落落之長松覲翔鸞之喬喬聽鳴

鳳之嗶嗶過靈溪而一濯疏煩想社心曾蕩遺
塵於旋流發五葢之遊蒙追羲農之絕軌躡二
老之玄蹤陟降信宿迄于仙都雙闕雲竦以來
路瓊臺中天而懸居珠閣玲瓏於林間玉堂陰
映於高隅彤雲斐亶以翼樞轂日炯晃於綺疏
八桂森挺以凌霜五芝含秀而晨敷惠風佇芳
於陽林醴泉涌溜於陰渠建木滅景於千尋琪
樹璀璨而垂珠王喬控鶴以冲天應真飛錫以
躡虛騁神轡之揮霍忽出有而入無於是遊覽

既周體靜心閑害馬已去世事都捐投刃皆虛
目牛無全凝思幽巖朗詠長川爾乃羲和亭午
遊氣高褰法鼓琅以振響衆音馥以揚煙肆觀
天宗爰集通仙挹以玄玉之膏漱以華池之泉
散以象外之說暢以無生之篇悟遣有之不盡
覺涉無之有間泯色空以合跡忽卽有而得玄
釋二名之同出消一無於三幡恣語樂以終日
等寂默於不言渾萬象以冥觀兀同體於自然

望海賦

五湖同浸九江叢漑抱河含濟吞淮納泗南際
沅湘西引涇渭洲渚迢遞以疏屬島嶼綿邈以
牢羅殖鬼崔之碣石構穹隆之牂牁玄奧之府
重刃之房鱗彙萬殊卑產無方包隋珠衡夜光
璚瑁熠爍以泳游螭螭煥爛以映漲虛貝含素
而表紫螻螺絡丹而帶緇青甲芬飈以微扇玄
木杳渺以舒芳其卉木則綠苔石髮蔓以流綿
紫莖萑綜解以被渚華組依波而錦披翠綸扇

風而繡舉長鯨嶽立以截浪蚘蛄揚鬚以排流
巨鼈負以冠山鳥鰲呼翕以吞舟鵬爲羽傑
鯢稱介豪翼遮半天背負重霄舉翰則宇宙生
風抗鱗則四瀆起濤考萬川以周覽亮天地之
綜緯彌綸八荒且帶九地昏明注之而不溢尾
閭洩之而不匱

又

若乃惟馨陳祈祝不愧言或適於東或歸于西
商客齊暢潮流往還各資順勢雙帆同懸倏如
騶驛背馳孥如交集輕軒

遂初賦

余少慕老莊之道仰其風流久矣却屣於陵賢
妻之言悵然悟之乃經始東山建玉飲之宅帶
長阜倚茂林孰與坐華幕擊鐘鼓者同年而語
其樂哉

詩

表哀詩

并序

天地之德曰生生之所恃者親親存則歡泰
情盡親亡則哀悴理極故老萊婆娑於膝下
曾閔泣血於終年哀悼之恩至矣自然之性
篤矣余以薄祐夙遭閔凶越在九齡嚴考卽
世未及志學過庭無聞天覆旣淪俯憑坤厚
殖根外氏賴以成訓然以不才不能負荷仁
妣弘母儀之德邁榮寒之操雕琢固頑勉以

道義庶幾砥礪犬馬之報豈悟一朝復見孤
葉上天極禍怨痛莫訴皆由惡積咎深不能
通感自丁荼毒載離寒暑萬難塵寂棟宇寥
恍仰悲軌迹長自矜悼不勝哀號作詩一首
敢冒諒闇之譏以申罔極之痛詩曰

茫茫太極賦受理殊咨生不辰仁考宿

一作徂風

微微冲弱眇眇偏孤叩心昊蒼痛貫黃墟肅我
以義鞠我以仁嚴邁商風恩洽陽春昔聞鄒母
勤教善分懿矣慈妣曠世齊運嗟予小子譬彼

土蜚俯愧陋質仰忝高訓悠悠玄運四氣錯序
自我酷痛載離寒暑寥寥空堂寂寂響戶塵蒙
几筵風生棟宇感昔有特望晨遲顏婉變懷袖
極願盡歡柰何慈妣歸體幽挺酷矣痛深剖髓
摧肝

三月三日

姑洗幹運首陽穆闡嘉卉萋萋溫風暖暖言滌
長瀨聊以游衍縹萍渙流綠柳蔭坂羽從風飄
鱗隨浪轉

蘭亭集詩二首

春詠登臺亦有臨流懷彼伐木肅此良儔脩竹
陰沼旋瀨縈丘穿池激湍連濫觴舟

流風拂枉渚停雲蔭九臯鶯語吟脩竹游鱗戲
瀾濤攜筆落雲藻微言剖纖毫時珍豈不甘忘
味在聞韶

王羲之蘭亭集詩二首附

代謝鱗次忽焉以周欣此暮春和氣載柔詠
彼舞雩異世同流廼攜齊契散懷一丘

仰視碧天際俯瞰淡水濱寥闊無涯觀寓目
理自陳大矣造化工萬殊莫不均羣籟雖參
差適我無非親

秋日

蕭瑟仲秋日颼唳風雲高山居感時變遠客興
長謡疎林積涼風虛岫結凝霄湛露灑庭林密
葉辭榮條撫菌

藝文作葉

悲先落鬱

一作攀

松笑後凋

垂綸在林野交情遠市朝澹然古懷心濠上豈
伊遙

情人碧玉歌二首

碧玉小家女不敢攀貴德感郎千金意慙無傾
城色

碧玉破瓜時郎爲情顛倒感君不羞赧迴身就
郎抱

疏

諫移都洛陽疏

伏見征西大將軍臣溫表便當躬率三軍討除
二寇蕩滌河渭清灑舊京然後神旂電舒朝耀
濟江反皇居於中土正玉衡於天極斯超世之
宏圖千載之盛事然臣之所懷竊有未安以爲
帝王之興莫不藉地利人和以建功業貴能以
義平暴因而撫之懷愍不建淪胥秦京遂令胡
戎交侵神州絕綱土崩之釁誠由道喪然中夏

蕩蕩一時橫流百郡千城曾無完郭者何哉亦
以地不可守投奔有所故也天祥未革中宗龍
飛非惟信順協於天人而已實賴萬里長江嚮
而守之耳易稱王公設險以守其國險之時義
大矣哉斯已然之明效也今作勝談自當任道
而遺險校實量分不得不保小以固存自喪亂
已來六十餘年蒼生殄滅百不遺一河洛丘墟
函夏蕭條井堙木刊阡陌夷滅生理茫茫永無
依歸播流江表已經數世存者長子老孫亡者

丘隴成行雖北風之思感其素心目前之哀實
爲交切若遷都旋軫之日中興五陵卽復緬成
遐域泰山之安旣難以理保烝烝之思豈不纏
於聖心哉溫今此舉誠欲大覽始終爲國遠圖
向無山陵之急亦未首決大謀獨任天下之至
難也今發憤忘食忠慨亮到凡在有心孰不致
感而百姓震駭同懷危懼者豈不以及舊之樂
賒而趣死之憂促哉何者植根於江外數十年
矣一朝拔之頓驅蹶於空荒之地提挈萬里踰

險浮深離墳墓棄生黎富者無三年之糧貧者
無一殮之飯田宅不可復售舟車無從而得捨
安樂之國適習亂之鄉出必安之地就累卵之
危將頓仆道塗飄溺江川僅有達者夫國以人
爲本疾寇所以爲人衆喪而寇除亦安所取裁
此仁者所宜哀矜國家所宜深慮也自古今帝
王之都豈有常所時隆則宅中而圖大勢屈則
遵養以待會使德不可勝家有三年之積然後
始可謀太平之事耳今天時人事有未至者矣

一朝欲一字宙無乃頓而難舉乎臣之愚計以爲且可更遣一將有威名資實者先鎮洛陽於陵所築二壘以奉衛山陵埽平梁許清一河南運漕之路旣通然後盡力於開墾廣田積穀漸爲徙者之資如此賊見亡徵勢必遠竄如其迷逆不化復欲送死南北諸軍風馳電赴若身手之救痛痒率然之應首尾山陵旣固中夏小康陛下且端委紫極增脩德政躬行漢文簡樸之至去小惠節游費審官人練甲兵以養士滅寇

爲先十年行之無使隳廢則貧者殖其財怯者
充其勇人知天德赴死如歸以此致政猶運諸
掌握何故捨百勝之長理舉天下而一擲哉陛
下春秋方富溫克壯其猷君臣相與弘養德業
括囊元吉豈不快乎今溫唱高議聖朝互同臣
以輕微獨獻管見出言之難實在今日而臣區
區必聞天聽者切以無諱之朝狂瞽進說芻蕘
之謀聖賢所察所以不勝至憂觸冒干陳若陛
下垂神溫少留意豈非屈於一人而允億兆之

願哉如以干忤罪大欲加顯戮使丹誠上達退
受刑誅雖沒泉壤尸且不朽

爲功曹參軍綴事牒

綱紀居管轄之任以糾劄外內駁議彈射誠無
所拘然亦有所以獻可替否舉直違枉者也

論

喻道論

或有疑至道者喻之曰夫六合遐邈庶類殷充
千變萬化渾然無端是以有方之識各期所見
鱗介之物不達臯壤之事毛羽之族不識流浪
之勢自得於窻井者則怪遊溟之量翻翥於數
仞者則疑冲天之力纏束世教之內肆觀周孔
之跡謂至德窮於堯舜微言盡乎老易焉復觀
夫方外之妙趣寰中之玄照乎悲夫章甫之委

裸俗韶夏之棄鄙俚至直絕於漫習大道廢於
曲士也若窮迷而不遷者非辭喻之所感試明
其旨庶乎有悟於其聞者焉

夫佛也者體道者也道也者導物者也應感順
通無爲而無不爲者也無爲故虛寂自然無不
爲故神化萬物萬物之求卑高不同故訓致之
術或精或麤悟上識則舉其宗本不順者復殃
放酒者羅刑姪爲大罰盜者抵罪三辟五刑犯
則無赦此王者之常制宰牧之所司也若聖王

御世百司明達則向之罪人必見窮測無逃形
之地矣使姦惡者不得容其私則國無違民而
賢善之流必見旌叙矣且君明臣公世清理治
猶能令善惡得所曲直不濫况神明所莅無遠
近幽深聰明正直罰惡祐善者哉故毫釐之功
錙銖之獎報應之期不可得而差矣歷觀古今
禍福之證皆有由緣載籍昭然豈可掩哉何者
陰謀之門子孫不昌三世之將道家明忌斯非
兵凶戰危積殺之所致邪若夫魏顆從治而致

結草之報子都守信而受驄之錫齊襄委罪
故有墜車之禍晉惠棄禮故有弊幘之困斯皆
死者報生之驗也至於宣孟愍鬻桑之饑漂母
哀淮陰之憊並以一餐拯其懸餒而趙蒙倒戈
之祐毋荷千金之賞斯一獲萬報不踰世故立
德闇昧之中而慶彰萬物之上陰行陽曜自然
之勢譬猶灑粒於土壤而納百倍之收地穀無
情於人而自然之利至也

或難曰報應之事誠皆有徵則周孔之教何不

去殺而少正卯刑二叔伏誅邪答曰客可謂達
教聲而不體教情者也謂聖人有殺心乎曰無
也答曰子誠知其無心於殺殺國百姓之心耳
夫時移世異物有薄淳結繩之前陶然太和暨
於唐虞禮法始興爰逮三代刑網滋彰刀斧雖
嚴而猶不懲至于君臣相滅父子相害吞噬之
甚過於豺虎聖人知人情之固於殺不可一朝
而息故漸抑以求厥中猶蝮蛇螫足斬之以全
身癰疽附體決之以救命亡一以存十亦輕重

之所權故刑依秋冬所以順時殺春蒐夏苗所
簡胎乳三驅之禮禽來則韜弓聞聲視生肉至
則不食鈞而不網弋不射宿其於蠅蟲每加隱
惻至於讖獄緩死膏災肆赦刑疑從輕寧失有
罪流涕授鉞哀矜勿喜生育之恩篤矣仁愛之
道盡矣所謂爲而不恃長而不宰德被而功不
在我日用而萬物不知舉茲以求足以悟其歸
矣

或難曰周孔適時而敎佛欲頓去之將何以懲

暴止姦統理羣生者哉答曰不然蓋孔卽佛佛
卽周孔蓋外內名之耳故在皇爲皇在王爲王
節者梵語晉訓覺也覺之爲義悟物之謂猶孟
軻以聖人爲先覺其旨一也應世執物蓋亦隨
時周孔救極弊佛教明其本耳共爲首尾其致
不殊卽如外聖有深淺之跡堯舜世夷故二后
高讓湯武時難故兩君揮戈淵默之與赫斯其
跡則胡越然其所以跡者何嘗有際哉故逆尋
者每見其二順通者無往不一

或難曰周孔之教以孝爲首孝德之至百行之本本立道生通于神明故子之事親生則致其養沒則奉其祀三千之責莫大無後體之父母不敢夷毀是以樂正傷足終身含愧也而沙門之道委離所生棄親卽疎刈剔鬚髮殘其天貌生廢色養終絕血食骨肉之親等之行路背理傷情莫此之甚而云弘道教仁廣濟羣生斯何異斬刈根本而脩枝榦而言不殞碩茂未之聞見皮之不存毛將安附此大乖於世教子將何

以祛之答曰此誠窮俗之所甚或倒見之爲大
謬諮嗟而不能默已者也夫父子一體惟命同
之故母嚙其指兒心懸駭者同氣之感也其同
無間矣故唯得其歡心孝之盡也父隆則子貴
子貴則父尊故孝之爲貴貴能立身行道永光
厥親若匍匐懷袖日御三牲而不能令萬物尊
已舉世我賴以之養親其榮近矣夫緣督以爲
經守柔以爲常形名兩絕親我交忘養親之道
也旣已明其宗且復爲客言其次者夫忠孝名

不並立。穎叔達君書稱純孝。石碣戮子武節。乃全傳曰。子之能仕。父教之忠。策名委質。二乃辟也。然則結纓公朝者。子道廢矣。何見危授命。誓不顧親。皆名注史。筆事標教。首記注者。豈復以不孝爲罪。故諺曰。求忠臣必於孝子之門。明其雖小違於此。而大順於彼矣。且絲放遐裔。而禹不告退。若令委堯命以尊父。屈至公於私憾。斯一介之小善。非大者遠者矣。周之泰伯遠棄骨肉。託跡殊域。祝髮文身。存亡不反。而論稱至德。

書著大賢誠以其忽南面之尊保淳虛之貴三
讓之功遠而毀傷之過微也故能大華夷俗流
風垂訓夷齊同餓首陽之上不恤孤竹之胤仲
尼目之爲仁賢評當者寧復可言悖德乎梁之
高行毀容守節宋之伯姬順理忘生並名冠烈
婦德範諸姬秉二婦之倫免愚悖之譏耳率此
以談在乎所守之輕重可知也昔佛爲太子棄
國學道欲全形以遁恐不免維繫故釋其鬚髮
變其章服旣外示不及內脩簡易於是捨華殿

而卽曠林解龍衮以衣鹿裘遂垂條爲宇藉草
爲茵去櫛梳之勞息湯沐之煩頓馳驚之轡塞
欲動之門目遏玄黃耳絕滯聲口忘甘苦意放
休戚心去於累胷中抱一載平營魄內思安般
一數二隨三止四觀五還六淨遊志三四出入
十二門禪定拱默山停淵淡神若寒灰形猶枯
木端坐六年道成號佛三達六通正覺無上雅
身丈六金色焜耀光遏日月聲協八風相三十
二好姿八十形偉羣有神足無方於是遊步三

界之表恣化無窮之境廻天僊地飛山結流存
亡倏忽神變懸邈意之所指無往不通大範羣
邪遷之正路衆魔小道靡不遵服于斯時也天
清地潤品物咸亨蠢蠕之生浸毓靈液枯槁之
類改瘁爲榮還照本國廣敷法音父王感悟亦
升道場以此榮親何孝如之於是後進篤志之
士被服弘訓思齊高軌皆由父老不異所尙承
歡心而後動耳若有昆弟之列者則服養不廢
旣得弘脩大榮而恩紀不替且令逝沒者得福

報以生天不復顧歆於世祀斯豈非兼善大通之道乎夫東鄰宰牛西鄰禴祀殷矣黍稷周尚明德興喪之期於茲著矣佛有十二部經其四部專以勸孝爲事慇懃之旨可謂至矣而俗人不詳其源流未涉其塲肆便瞽言妄說輒生攻難以螢燭之見疑三光之盛芒隙之滴怪淵海之量以誣罔爲辨以果敢爲名可謂狎大人而侮天命者也

孫廷尉集卷之二

晉太原孫綽與公著

明閩漳張燮紹和纂

序

蘭亭集後序

古人以水喻性有旨哉非所以淳之則清淆之則濁耶故振轡於朝市則克屈之心生閒步於林野則寥落之意興仰瞻羲唐邈然遠矣近詠臺閣顧探增懷聊於曖昧之中期乎瑩拂之道

暮春之始禊于南澗之濱流觴千尋長湖萬頃
乃藉芳草鑑清流覽卉物觀魚鳥其類同榮資
生咸暢於是和以醇醪齊以達觀快然兀矣焉
復覺鵬鷁之二物哉耀靈縱轡急景西邁樂與
時去悲亦系之徃復推移新故相換今日之迹
明復陳矣原詩人之致興諒歌詠之有由

王羲之蘭亭集序附

永和九年歲在癸丑暮春之初會于會稽山
陰之蘭亭脩禊事也羣賢畢至少長咸集此

地有崇山峻嶺茂林脩竹又有清流激湍映帶左右引以爲流觴曲水列坐其次雖無絲竹管絃之盛一觴一詠亦足以暢叙幽情是日也天朗氣清惠風和暢仰觀宇宙之大俯察品類之盛所以遊目騁懷足以極視聽之娛信可樂也夫人之相與俯仰一世或取諸懷抱悟言一室之內或因寄所託放浪形骸之外雖趨舍萬殊靜躁不同當其欣於所遇暫得於已快然自足不知老之將至及其所

之既倦情隨事遷感慨係之矣向之所欣俛仰之間以爲陳迹猶不能不以之興懷况脩短隨化終期於盡古人云歿生亦大矣豈不痛哉每攬昔人興感之由若合一契未嘗不臨文嗟悼不能喻之於懷固知一死生爲虛誕齊彭殤爲妄作後之視今亦由今之視昔悲夫故列叙時人錄其所述雖世殊事異所以興懷其致一也後之攬者亦將有感於斯

文

碑

太尉庾亮碑

次黃巾以啓胃鍾遐武於軒轅爰及晉代世號
多士公吸峻極之秀氣誕命世之深量徵言散
於秋毫玄風暢乎德音闕門者貴其凝峙入室
者議其通玄標形者得之廊廟悟旨者期諸濠
川提挈南翔息肩靈越會大君有命納妃德門
自求多福辭不獲已鳳羽籠于華樊麟趾繫于
椒房王敦阻兵玩權志窺神器乃轉公左衛將

軍要雄戟以扶華轂精武旅以翼豹尾死難之
心義形于色親愛申詔奔告方伯於是羣后擇
盟同稟高謀嚴輅懷德以嚮赴義拯神器於默
吻扶帝座於已傾王室之不壞繫伯舅是賴公
以爲戰伐之謀仁所恥聞况立德弘道年幾不
惑闔門沈舟將遠迹山海詔累遣侍中黃門遍
以嚴制知不獲免乃固求外任江外無烽燧之
警宇內歸穆然之美銘曰

金德時昏乾綱絕紀素靈南映中宗蔚起誰其

贊之數鍾伊公達人忘懷形隨運運再潛再躍
宛若游龍

太傅褚裒碑

公資清剛之正氣挺純粹之茂質深量體於自然冲識是乎弱冠含章內映而不運儼察之明玄識沈通而不以浮藻耀物穆然忘容塵務不干其度默爾獨得膚見莫測其奧加以溫恭孝友少思寡慾都督兖州刺史將以藩屏畿甸綏撫宇內會康皇晏駕太后臨朝總已之重民無異望乃徵將軍中書令錄尚書事公要終之識定於介石雖事已未來而情以本應顧以主少

國危方難未夷思清陋夏以一天宇且帝命所
存以社稷爲寄謀身雖重方此爲輕深爲意疾
俛首撫順公志在芟夷兇類拯拔晉民繕甲練
卒日不暇給者久矣遂見機而作遺其劍履將
龍馬河洛電掃司豫廟算以逆徒尚繁困獸難
逼命公還旆以俟齊舉雖元勳未捷義聲亦足
以振暴於華夷矣銘曰

邈邈遠遊疊疊令圖將激淮海灑滌中區雅業
未究哲人其徂敢勒玄石敬刊高議

丞相王導碑

公胄興姬文氏由王喬玄聖陶化以啓源靈仙
延祉以分流賢俊相承世冠海岱二儀交泰妙
氣發暉醇曜所鍾公實應之玄性合乎道旨冲
一體之自然柔暢協乎春風溫煥侔於冬日信
人倫之水鏡道德之標準也惠懷之際運在大
過皇德不建神繼再絕儉狃孔熾凶類猋起公
見機而作超然玄悟遂扶翼蕃王室協東岳弘
大順以一羣后之望杖主道以應天人之會于

時乾維隆振創制理物申宗拱已雅仗賢相尙
父之任其瞻在公有烹鮮之義殉易簡之政大
略宏規卓然可述公雅好談詠恂然善誘雖管
絃時務一日萬機夷心以延白屋之士虛已以
招巖穴之俊逍遙放意不峻儀軌公執國之鈞
三十餘載時難世故備經之矣夷險理亂常保
元吉匪躬而身全遺功而勲舉非夫領鑒玄達
百鍊不渝孰能莫忤於世而動與理會者哉

潁州府君碑

君天縱傑邁奇逸卓犖茂才亮拔雅度恢廓通
理遠鑒之識禮樂飾身之具固以足之於天何
冠之於縉紳出匡南位功深於爵金龜三曜冲
懷再發道光古賢風改彫僞允可謂明德宏猷
贊世之偉器者矣矯矯秀姿卓卓英韻他人之
高及肩而已邀命有數託生皇代所忝之至人
知其幸况在懷情而無自識但親勤未効違離
已及低徊房禁攀戀罔遺

頌

聘士徐君墓頌

序

晉南昌相太原縣君白漢故聘士徐君之靈惟
君風軌英遠音徽遠播飡仰芳流宗揖在昔古
人有言聞伯夷之風者懦夫有立志仰先生之
道豈無青雲之懷哉余以不才忝宰茲邑遐宗
有道思揖遠風乃與友人殷浩等束帶靈墳奉
瞻祠宇雖玉質幽潛而目想令儀雅音永寂而
心存高範徘徊墟壠仰眄松林哀有形之短化

悼令德之長泯撫然有感悽然增傷夫飄謠生
於情託雅頌興乎所欽匪於詠述孰寄斯懷頌
曰

巖巖先生邁此英風含真獨暢心夷體冲高蹈
域表淑問顯融昂昂五賢赫赫八俊雖曰休明
或嬰險吝登若先生保茲玉潤超世作範流光
遐振墳塋磊落松竹蕭森薈叢蔚蔚虛宇惜惜
遊獸戲阿嚶鳥鳴林嗟乎徐君不聞其音徘徊
丘側悽焉流襟何以舒蘊援翰託心

贊

賀司空循傳贊

有序

公應天縱之德系命世之期質與荆玉參貞鑒
與南金等照若其好學之性不勸而成弱不珍
玩雅好博古慨汰泗之邈遠悼禮樂之不舉於
是覃思深講銳精幽贊雖齊侯之歸孟軻漢王
之宗仲舒無以加焉贊曰

思文公侯誕保休祥素質玉潔華藻金章總角
韞德被褐韞光自昔喪亂鉦鼓日震禮樂藏器

詩書蒙塵哲人遐慨垂幃澄神仰觀涿泗揚波
絕津方曜金鉉協贊衡機昊天不弔會不憖遺
縉紳頽範皇德莫毗公之云徂華裔同悲

孔松楊像贊

有序

君德旣純國基宇高遼荆王不及喻其溫南金
未能方其厲夫其溫恭篤誠善誘勤勸外身崇
物匪躬厚人指撝必謙動靜克讓允有古賢之
流風乃祖之遺令矣肇階方尺臨政弊邑潔齊
冬冰澤侔春露

於穆我后舍和體純行範乃祖德冠縉紳降迹
垂化澤侔三春超然遐舉遺愛在民

某太常碑贊

海岱協靈育此多士
戔戔君侯東國之紀
金德發耀英風劬起
文齊游夏行儔魯史
有邈其升令問不已
人亦有言德崇譽迥
東帛旣言旌節仍招
儀刑朝堂流風丹青
將振華袞永煥皇朝
上帝靡盬曾不遐齡
衛霍頽鎮哲人其傾
邦國殄瘁縉紳喪情
仰拜高範永播休聲

老子贊

李老無爲而無不爲道一堯孔跡又靈奇塞關
內鏡冥神絕涯永合元氣契長兩儀

商丘子贊

商丘卓犖執策吹竽渴飲寒泉饑食蒿蒲所牧
何物殆非真緒儻逢風雲爲我龍攄

原憲贊

原憲玄默冰清玉粹志逸九霄身安陋術

道壹贊

馳騁遊說言固不虛雖茲壹公綽然有餘譬若
春圃載芬載敷條柯猶蔚枝幹扶疎

釋道安贊

物有廣贍人固多宰淵淵釋安專能兼倍飛聲
泝龍馳名淮海形雖草創若常在

康僧會

會公蕭瑟寔惟令質心無近累情有餘逸厲此
幽夜振彼元黜超然遠詣卓矣高出

康法朗

銘

太平山銘

鬼裁太平峻踰華霍秀嶺樊縕奇峰挺擧上于
翠霞下籠丹壑有士冥遊默往奇託肅形枯林
映心幽漠亦旣觀止渙焉融滯懸棟翠微飛宇
雲際重巒蹇產廻溪縈帶被以青松灑以素瀨
流風佇芳翔雲停藹

漏刻銘

二儀貞運聖鑒通玄數以器徵理以象宣乃制
妙漏挈壺是銓近取諸物遠贊自然累簡三階
積水成淵器滿則盈乘虛赴下靈虬吐注陰蟲
承瀉昏明無隱其晷度陰陽是效其屈伸不下
堂而天地理得設一器而萬事同倫

樽銘

大匠體物妙思入神儀彼靈金
鑄爲人虛以含有文以飾身湛此
玄醴延我嘉賓興懷寄詠聊以標
設詳觀茲器妙巧奇絕酌焉則注
受滿則側吐寫適會未見其竭與
之無若施而有節玄應忘知功存
不伐王公擬之德齊上哲

誄

庾公誄

咨予與公風流同歸擬量託情觀公猶師君子
之交相與無私虛中納是些語誨非離實不敏
敬佩弦韋永戢話言口誦心悲與公作庾公誄
文多寄托之辭
既成示庾道恩庾見慨然
曰先君與君自不至於此

王長史誄

余與夫子交非勞利心猶澄水同此玄味王年

曰亡祖何至
與此人周旋

附錄

孫綽傳

唐太宗

綽字興公博學善屬文少與高陽許詢俱有高
尚之志居于會稽游放山水十有餘年乃作遂
初賦以致其意常鄙山濤而謂人曰山濤吾所
不解吏非吏隱非隱若以元禮門爲龍津則當
黥額暴鱗矣所居齋前種一株松恒自守護鄰
人謂之曰樹子非不楚楚可憐但恐永無棟梁
日耳綽荅曰楓柳雖復合抱亦何所施邪綽與

詢一時名流或愛詢高邁則鄙於綽或愛綽才藻而無取於詢沙門支遁試問綽君何如許荅曰高情遠致弟子早已伏膺然一詠一吟許將北面矣絕重張衡左思之賦每云三都二京五經之鼓吹也嘗作天台山賦辭致甚工初成以示友人范榮期云卿試擲地當作金石聲也榮期曰恐此金石非中宮商然每至佳句輒云應是我輩語除著作佐郎襲爵長樂侯綽性通率好譏調嘗與習鑿齒共行綽在前顧謂鑿齒曰

沙之汰之瓦石在後鑿齒曰鯀之陂之糲糲在
前征西將軍庾亮請爲參軍補章安令徵拜太
學博士遷尙書郎揚州刺史殷浩以爲建威長
史會稽內史王羲之引爲右軍長史轉永嘉太
守遷散騎常侍領著作郎時大司馬桓溫欲經
緯中國以河南粗平將移都洛陽朝廷畏不敢
爲異而北土蕭條人情疑懼雖並知不可莫敢
先諫綽乃上疏桓溫見綽表不悅曰致意興公
何不尋君遂初賦知人家國事邪尋轉廷尉卿

孫廷獻集

附錄

二

領著作綽少以文才垂稱于時文士^綽爲其冠
溫王郅庾諸公之薨必須綽爲碑文然後刊石
焉年五十八卒

遺事

撫軍周孫興公別真長何如曰清風簡令王仲祖何如曰溫潤帶和桓溫何如曰高爽邁出謝仁祖何如曰清易令達阮思曠何如曰弘潤通長袁羊何如曰洮洮清便殷洪遠何如曰遠有致思卿自謂何如曰下官才能所經悉不如諸賢至斟酌時宜籠罩當世亦多不及然以不才時復託懷玄勝遠詠老莊蕭條高寄不與時務經懷自謂此心無所與讓也

世說新語

習鑿齒孫興公未相識居在桓公坐桓語孫可
與習參軍共語孫云盡當荆蠻敢與大邦爲讐

習云薄伐獫狁至于太原

世說新語

孫興公爲庾公參軍共遊白石山衛君長在坐
孫曰此子神情都不關山水而能作文庾公曰
衛風韻雖不及卿諸人傾倒處亦不近孫遂沐

浴此言

世說新語

孫興公道曹輔佐才如白地明光錦裁爲負版

衿非無文采酷無裁製

世說新語

孫興公許玄度共在白樓亭高瞻先往名德林

公聽流云二賢故自有才情

世說新語

有北來道人好才理與林公相遇瓦官寺講小品于時竺法深孫興公悉共聽屢設疑難林公辯荅清析辭氣俱爽此道人每輒摧屈孫問深公上人當是逆風家向來何以都不言深公笑而不荅林公曰白旃檀非不馥焉能逆風深公得此義夷然不屑

世說新語

王文度弟阿智惡乃不趨當年長而無人與婚

孫興公有一女亦僻錯無嫁娶理因詣文度求
見阿智既見便陽言此定可殊不如人所傳那
得至今未有婚處我有一女乃不惡但吾寒士
不宜與卿計欲令阿智娶之文度欣然啓藍田
云興公向來忽言欲與阿智婚藍田驚喜既成
婚女之頑嚚欲過阿智方知興公之詐世說新語
孫綽爲劉惔誅曰居官無官官之事處事無事
事之心時人以爲名言晉書

會稽孔沈魏顗虞存謝奉並是四族之雋

于時之傑孫興公曰之曰沈爲范家金頭爲魏
家玉虞爲長琳宗謝美弘道伏

謝萬敘四隱四顯爲八賢之論謂漁父屈原季
主賈誼楚老龔勝孫登嵇康也其旨以處者爲
優出者爲劣孫綽難之以謂體玄識遠者則出
處同歸時以孫義爲得

中興書

孫綽爲著作郎每自暗中見筆端吐光若火雲

雜記

集評

永嘉以來清虛成俗王武子輩詩貴道家之言

爰泊江表猶相襲世稱孫許彌善恬淡之辭

詩品

孫綽旋規以矩步故倫序而寡狀

文心雕龍

孫綽爲文志在碑誄溫王郗庾辭多支離桓彝

一篇最爲辯裁

文心雕龍

孫綽之碑嗣伯喈之後

齊書文學傳後

王弼何晏好玄勝之談世遂貴焉至過江佛理

尤盛故郭璞五言始會合道家之言而韻之許

詢孫綽轉相祖尙又加以三世之辭而詩騷之
體盡矣詢綽並爲一時文宗自此作者悉體之
至義熙中謝混始改

續晉
陽秋

孫綽作商丘子贊時人多以爲能王藍田語人
曰近見孫家兒作文道何物真藉也

世說
新語

孫綽詩疎林積涼風虛岫結凝霄上官儀詩密
樹風煙積迴塘荷葉新蓋因此積字也

劉涇
詩話